



ÖSTERREICHISCHE  
NATIONALBIBLIOTHEK

213548-B

ALT-

213.548





40/5

40-9-16


th













*Morelli, Jacopo*

ALDI PII MANUTII

SCRIPTA TRIA

LONGE RARISSIMA

A IACOBO MORELLIO

DENUO EDITA

ET ILLUSTRATA



BASSANI

TYPIS REMONDINIANIS

M. DCCC. VI.

213548-B.



## PRAEFATIO

**N**EMO erit, opinor, qui monumenta ingenii ab ALDO PIO MANUTIO litteris tradita, si quae adhuc lateant, in lucem proferri non valde probet; quandoquidem vir ille de re litteraria immortaliter meritus nihil potius tota ferre vita habuit, quam ut veterum suaeque aetatis illustrium auctorum scripta typis committeret ac evulgaret. At vero ea praesertim ut apud homines eruditionis cupidos gratiam ineant, par est, quae tum ALDI doctrinam aperitius explicant, tum ad historiae litterariae et bibliographiae capita necdum perspecta cognoscenda simul quoque fa-

ciunt; cuiusmodi haec ipsa, quae nunc prodeunt, omnino sunt. Vix equidem fieri posse videbatur, ut posteaquam in ALDI memoria instauranda, librisque vel suis, vel alienis eius cura impressis, illustrandis Zenus, Maittairius, Ungerus, Mannius, Zacharias, Renovardius alique operam utique multam posuere, scripta ulla occulta superessent, quorum ex editione nova, eaque scitu digna cognosci possent, laudisque accessio non levis viro laudatissimo exstaret. Fecit attamen sollicitudo studiumque pervicax, quo libellos bonitate iuxta ac raritate praestantes, mea ipsius amicorumque opera, conquirere iamdiu assuevi, ut hac quoque in re fructum suavem coeperim; quem cum iis qui in rebus eiusmodi eadem me-

cum voluptate tenentur modo comunicare lubet. Neque me a consilio deterret, quod scripta horum duo typis iam edita fuerint; cum de iis impressis, aut manu scriptis, quantum equidem constat, nemo meminerit, nemo indicium ullum fecerit, atque adeo velut inedita eadem excipienda propemodum sint.

Musarum Panegyris ad Albertum Pium et quæ simul accedunt, absque ulla loci typographi annique nota, in quarta folii forma, ut dici consuevit, impressa sunt, chartis vix septem comprehensa. Exemplaria editionis, nisi duo, non ego novi: alterum in bibliotheca Quiriniana Brixienti exstat, quod Vincentius Bighellius, vir litterarum studio et humanitate præstans, eius

Praefectus, apographo manu sua sumpto, mihi primum communicavit: alterum est apud Franciscum Tacconium Marchionem Sitizzani, aerario Regis utriusque Siciliae olim Praefectum, qui ut illud ipsum ex bibliotheca sua locupletissima mihi id expetenti inspiciendum mitteretur, pro eximia humanitate sua, postea fecit. Ut vidi ac expendi, libellum Venetiis impressum haberi posse plane cognovi; quod characteres, haud quaquam Aldini, aequae ac officinae chartariae notae, iidem omnino in eo sint, qui in libris tribus M. Antonii Sabellici de situ urbis Venetae aliisque, sine ulla nota, anno circiter mccccxcii, cura Antonii Moreti Brixienensis, impressis; itidemque in Epistolis Leonardi Arretini, ex eius-



dem Moreti recensione, an. MCCCCXCV, absque loci ac typographi nota, Venetiis recusis. Non idcirco tamen iis omnino annis Aldinum opusculum impressum fuisse ego statuo; quandoquidem, licet non ante ann. MCCCCLXXXVII idem scriptum appareat, quod Petrum Baroccium Episcopum Patavinum obiiciat, qui eo demum anno ex Episcopo Bellunensi Patavinus factus est (\*); vel ipsa tamen opusculi lectio suadet editum ab ALDO fuisse, quo tempore apud Pios Principes praeceptorem agebat, neque typographiam Venetiis adhuc erat aggressus: hanc vero se an-

(\*) *Chronicon Venetum inter Scriptores rerum Italicarum Muratorii T. XXIII. p. 1192. Hermolaus Barbarus Epist. ad P. Baroccium inter Epistolas claror. viror. Venetiis 1568. p. 119.*

no admodum MCCCCLXXXIX suscepisse, ALDUS ipse prodidit, cum in praefatione Thesauri Cornucopiae Hortorumque Adonidis anno MCCCXCVI scripsit : *Dura quidem provincia est, bonarum litterarum studiosi, emendate imprimere Latinos libros, durior accurate Graecos, durissima non depravate vel hos vel illos duris temporibus. Quanam lingua curem ipse imprimendos libros, et quo tempore, videtis. Postquam suscepi hanc duram provinciam (annus enim agitur iam septimus), possem iureiurando affirmare, me tot annos ne horam quidem solidae habuisse quietis.*

Quod sequitur, ALDI epigramma de Venere et Cupidine, codex mihi iamdiu obtulit, initio saeculi XVI, Ma-

rini Sanuti patricii Veneti manu scriptus, multorum temporis illius poetarum carmina continens, Venetiis in bibliotheca quadam privata, ad quam vix ulli aditus patere consuevit, asservatus. Exscripsi illud mihi statim: neque id tantum, sed etiam adolescenti cuidam dedi, qui totus in ALDI rebus erat, deque iis grande moliebatur opus, quod postea non fecit. Enimvero neque ab eo, neque ab alio editum unquam novi: luce tamen dignum, si quod aliud ALDI carmen, idem profecto est.

Academiae Aldinae Legem de collocationibus in ea Graece tantum habendis, etsi Scipionis Carteromachi verbis perscriptam, quod tamen ALDUM quoque, Academiae Principem, lato-

rem habuerit, cum scriptis eius locum habere suum posse putavi. Quibus institutis ac disciplinis societas illa moderaretur, ex hac una Lege, ad antiquitatis normam condita, deprehendere quodammodo licet; et hac in re ut clarior lux ab aliis monumentis affulgeat, iusta cupido inde exoritur. Eius mihi exemplar unum superstes innotuit, absque ullo indicio, typis utique Aldinis, anno circiter MDII, in folio, ut aiunt, volanti editum; quod Etymologici Magni anno MD Vene-  
tiis impressi integumento coniunctum in bibliotheca Barberinorum Romae Caietanus Marinius, nunc bibliothecae Vaticanae Custos primus, reperiit; Gaspar autem Garattonius, qui bibliothecae ipsi Barberinorum praeerat, mihi

totum exscripsit. Modo itaque fit ut duorum litteris et humanitate illustrium virorum favore, monumentum hactenus abditum evulgare possim: quod equidem ut magis adhuc pateat, Latine ipse reddidi. Ex hoc eodem mihi suspicari posse videtur acta alia quaedam Academiae Aldinae, foliis itidem singulis, impressa fuisse, ut commodo ipsius constituendae et administrandae consuleretur; non secus atque Academiam Venetam Famae appellatam postea usurpasse, multa eiusmodi folia ab Apostolo Zeno collecta mihi perspectum iamdiu fecere: quae eadem Ioanni Gottlob Lunzio opellae de hac Academia, Lipsiae anno 1801 editae, auctori nisi defuissent, uberius et accuratius argumentum illud pertractasset.

Haec de scriptis tribus Aldinis praefari opportunum esse duxi: alia quaedam in annotationibus adieci. Si quando, quod animo volvo, commentarium de Manutiis conficere et emittere licuerit; de vita et studiis eorum, deque libris ab iisdem scriptis, aliorumve editis, multa necdum cognita ut afferam, multaque ab aliis perperam dicta ut emendem, facile erit. Non huic tamen operi manus admovere constitui, nisi totum secundum Bibliothecae meae Manuscriptae Graecae et Latinae ad finem perduxero; cui iamdiu inchoato quantum temporis ab occupationibus superest, tantum impendo. Interea nullus dubito, quin alia de rebus Manutiorum adhuc occulta monumenta sint proditura; namque campus

ad inveniendum latissimus patet. Id novo et praeclaro argumento comprobare me posse video, si conspectum operis in lucem deducam, quod Ioannes Franciscus Lancelotius e Staphylo Piceni oppido, magno sane labore, paraverat, ac se proxime editurum anno 1777 pollicebatur. Haec porro mihi tunc ille scribebat:

*La Collezione mia conterrà pressochè trecento e più Lettere de' primi uomini di quel secolo, tutte inedite, e contenenti materie filologiche: e ve ne sono moltissime di Scipione Carteromaco, Marsilio Ficino, Desiderio Erasmo, Pietro Candido, Summonzio, Daniel Fini, Pietro Crinito, Giovanni Cuspiniano, Filippo Beroaldo il giuniore, Gio-*

*vanni Collaurio, Giovanni Fruticeno, Matteo Acquaviva, e di altri, tutte scritte ad Aldo il vecchio. Ve ne saranno alcune di Aldo medesimo inedite, con qualche di lui Poesia.*

*Di Paolo Manuzio poche Poesie, più Lettere Volgari e Latine, non state mai più pubblicate. Vi si ristamperanno altre di Paolo, stampate da esso in fogli volanti, ignote a tutti quelli che di Paolo hanno scritto; non che al Zeno padre della storia letteraria, le di cui ceneri rispetterò io sempre colla più viva venerazione.*

*Di Aldo il giuniore molte Lettere Italiane e Latine inedite, e circa quattordici Orazioni inedite, un*



*suo Commentario all' Orazione di Cicerone pro Lege Manilia, un Trattato De Statuis, ed altre coserelle.*

*Non sono da tacersi molte Lettere di Torquato Tasso inedite, di Dionisio Lambino, Giampietro Maffei, Antonio Fornari, Cristoforo Sassi, Marcantonio Mureto, Camillo Paleotti, Alvaro Gomez, Enrico-Farnesio, Pietro Corsi, Luca Solidano, Lanterio Appiani, Marcantonio Lombardini, Lorenzo Panciardi, Paolo Crellio, Giacomo Breisnick, Paolo Beni, Enea Ubaldi, Vitale Trakod, Daniel Mauck, Pietro Perpiniano, Pietro Miscovio, Giovanni Genesio Sepulveda, Girolamo Capra, Marcantonio Natta, Ottavio Sammarco, Giovanni Turrisiani, Girolamo Ros-*

*si da Ravenna , Francesco Riccardotti , Giovanni Riccardotti , Mario Nizolio , Giusto Lipsio , Giovanni Sario Zamoscio , Mariano Severi , Giovanni Sambuco , Giacomo Gortsc , Guido Gualtieri , Paolo Sacrati , Francesco Mancini , Lorenzo Campeggi , Gioachimo Toeelman , Orazio Cardaneto , Giacomo Roderigo Falconi , Nicasio Ellebodio Casletano , Giusto Vander Steinez , Girolamo Ciromi , Pietro ab Ordegheiss , Giovanni Caselio , Muzio Calini , Giovambattista Tizii , Girolamo Lippomano , Decio Brancaleone , Francesco Morando , Giampietro Marchisoni , Giulio Jacoboni , e di molti altri valentuomini , tutti amici di Paolo e di Aldo .*


*Questa suppellettile letteraria, per se medesima doviziosissima, sarà corredata di alcune mie note e delle notizie letterarie di ciascuno de' mentovati scrittori ed amici dei Manucci; oltrechè pure vi saranno Notizie estese della Famiglia de' Manucci, suoi individui, Accademia, e Tipografia Aldina, degli Accademici; ed un Catalogo cronologico esatto de' Libri da Aldo il vecchio pubblicati, colle Lettere o sia ristampa delle Lettere dedicatorie de' libri di Aldo il vecchio. Vi saranno più Poesie di Marcantonio Mureto, Francesco Vinta, Ercole Ciofani, Pompeo Arnolfini, Girolamo Faleti, Orazio Toscanella, Pecino Leiano, Francesco Mauro, Lorenzo Masso-*

*lo detto Pietro Monaco Cassinese, Ippolito Capilupi, Fabio Paulini, Giulio Segni, Niccola Spinola, Vincenzo Lauria, Guglielmo Fonlerio, Giovanni Pinadelli, Francesco Ben-  
cio, Claudio Binetti, Marcantonio Pichissini, Antonio Sulfrini, e di al-  
tri; tutte similmente inedite, in lo-  
de dei tre Manucci; oltre più testi-  
monianze onorevoli di molti scrittori  
di grido intorno a' Manucci suddet-  
ti. In somma, gran parte d'Euro-  
pa vi troverà alcuna cosa nuova in-  
torno a' suoi scrittori.*

*Eccole ristretta in breve la noti-  
zia, che desidera, del libro da me  
preparato per la stampa.*

*At enim, ex morte Lancelotii in-  
secuta, operis tam large promissi edi-*

tio prorsus evanuit. Etsi vero, quantum ex libris editis intelligi potest, commentario de Manutiis absolutissimo conscribendo par ille vir non esset; adeo magnam tamen copiam scriptorum, ex bibliothecis praesertim Romanis, diu multumque ab eo excussis, adornatam, apud ignavum fortasse quendam delitescere, qui bonarum litterarum studio tenentur, nisi aegre admodum, ferre non possunt.



MUSARUM PANAGYRIS  
 PER ALDUM MANNUCCIUM BASSIANATEM LATINUM  
 CUM HEXASTICHO ET PARAENESI EIUSDEM  
 AD ALBERTUM PIUM  
 MAGNIFICUM ATQUE INCLYTUM CARPI PRINCIPEM

HEXASTICHON

**C**armina delectant pueros: en carmina, Princeps (1),  
 Dant ad te faciles ex Helicone Deae;  
 Namque tuis etiam resonat Parnasia rupes  
 Laudibus, et nomen fertur ad astra tuum.  
 Prima arguta canit Clio, Cliusque sorores  
 Alternis recinunt te super ista sonis.

PANAGYRIS MUSARUM

CLIO

**O** fortunati quam maxima gloria Carpi,  
 Gloria per nullos emoritura dies,  
 Dive puer, carae spes et fidissima matris,  
 Dive puer, gentis spesque decusque Piae,  
 Cresce, quia expectant ornent tua tempora lauri,  
 Quas tibi servatas utraque Pallas habet:  
 Cresce, tibi quoniam magni debentur honores,  
 Quos tibi victori parta trophaea dabunt.

## MELPOMENE

Cresce tuis populis et carae, Alberte, parenti,  
 Fortuna heu semper cui peracerba fuit ;  
 Ex quo dilecti flevit sic fata mariti,  
 Esse ut crudeles diceret illa deos,  
 Crudelesque deos, crudeliaque astra vocaret,  
 Tam cito delicias quod rapuere suas,  
 Quodque suam potius voluisset fundere vitam,  
 Cernere quam funus coniugis aegra sui.

## POLYMNIA

Cresce ; virum populis nam cum te fecerit aetas,  
 Tutor eris gentis praesidiumque tuae.  
 Tu quoque solamen, tu spes, tu gloria solus,  
 Optimus et princeps : quare age cresce, puer,  
 Optimus heroum quot sunt, quotcunque fuerunt,  
 Et quot venturos fata severa trahent.  
 Nam tibi recte equidem nascenti, Alberte, recordor  
 Sic fore concordēs tres cecinisse deas.

## URANIA

Ergo tuum nomen cum fama obscura recondet,  
 Atque erit obscurus cum tuus altus honos,  
 Nec tibi perpetuum laudes, nec facta manebunt ;  
 Unda dabit segetes, sidera terra feret,



Omnia tunc retro convertent flumina cursum,  
 Lucis egens aer, lucis Olympus erit,  
 Enceladusque iterum supponet Pelion Ossae;  
 Sed dabitur magnos vincere posse deos.

## EUTERPE

Postquam te talem Parcae cecinere futurum,  
 Qui te non coleret ferreus ille foret:  
 Ferreus ille quidem; sed qui te odisse valeret,  
 Esset montanis saevior ille feris,  
 Atque foret multo calcato immanior angue,  
 Nec non vorticibus, dira Charybdi, tuis,  
 Stymphalidasque truces, et Cerberon ille trifaucem  
 Saevitia, et Stygias vinceret ille canes:

## TERPSICHORE

Esset et ille idem dignus sine fine renatis  
 Visceribus Tityi quod satiaret aves;  
 Sorte vel illius qui se sequiturque fugitque,  
 Versatur celeri dum levis orbe rotae;  
 Quodve, ut tu, esuriens esset tua, Tantale, poma,  
 Atque sitiret aquas, nec biberentur aquae;  
 Cervice aut misera ruiturum, Sisyphæ, ferret,  
 Quod petis, aut urges irrequietus, onus.

## THALIA

Si mulier; miserum natorum digna cruore  
 Esset crudeles commaculare manus,  
 Sive quod infando tauri poteretur amore  
 Altera Minoae machina Pasiphaes:  
 Si puer; a caro donum exitiale parente  
 Ferret, ut insanis obrueretur aquis,  
 Quodve foret turpis sceleratae flamma novercae,  
 Cui maris exitium monstra timenda darent:

## ERATO

Inclyte seu posset, Princeps, te odisse puella,  
 Cui staret medio pectore dura silex;  
 Digna quidem fato Phryxi foret illa sororis,  
 Quae Hellespontiatis nomina fecit aquis;  
 Sive quod irati manes placaret amantis  
 Mactata, aut caderet quod patris illa manu,  
 Fataque, post urnas iterumque iterumque repletas,  
 Ferret apud manes Tartareumque Iovem.

## CALLIOPE

Qui te amat, et qui te posthac, puer inclyte, amabit,  
 Et sanctos mores ingeniumque tuum,  
 Felix ille suos vel dextra computet annos,  
 Mortuus aethereas incolat ille domos.

At tu qui flava caput accingeris oliva,  
Virtute et facies qui tibi ad astra viam,  
Sis felix, volitaque hominum cum laude per ora,  
Vel coeleste cibus cum tibi nectar erit.

FINIS MUSARUM PANAGYREOS

PARAENESIS ALDI MANNUCCHII  
AD EUNDEM PRINCIPEM

**T**e super ista solent cantare alterna Camoenae,  
Haec de te Aonides carmina culta sonant.  
Quae tibi quandoquidem nobis iussere daremus,  
En dedimus: cantus perlege Pierios:  
Et cum carminibus nostrum, puer inclyte, librum  
Accipe, multa tibi qui pretiosa dabit.  
Perlege, disce: tuæ sic te praebere parenti  
Mirandum poteris, sic tibi crescet honos.  
Sic etiam divo semper, puer optime, Marco  
Carus eris: natum te velut ille fovet,  
Atque amat, et iusta tecum ditione gubernat  
Carpum; qui gentis firma columna Piae est.  
Marcus hic ille Pius, nulli pietate secundus,  
Eloquio priscos qui bene vincit avos:  
Marcus hic ille Pius, quo non praestantior alter  
Horrida Martigenas ducere ad arma viros.  
Huic multum ut placeas studeas noctesque diesque:  
Hunc mihi ceu patrem tu face semper ames:  
Ut patruo placeas, virtutem amplectere totis  
Viribus: interea quae damus usque legas.  
Nec tantum nostros libeat legisse libellos,  
Nec tantum chartis incubuisse meis:

Perlege, disce etiam, Pallas tibi docta legendos  
 Quos Romana dedit, quosque Pelasga dedit,  
 Et vigila, atque almae virtuti incumbere, labores  
 Perfer, ut accedat laurea bina tibi.  
 Sic sublime tuum tolles ad sidera nomen,  
 Mistus eris magnis magnus et ipse viris.  
 Interea Graios, divina volumina, libros,  
 Et cum Romanis haec mea scripta lege;  
 Namque ubi grammaticen pueros docuere Latinam,  
 Instituunt cultos dicere posse modos.  
 Dehinc tibi nos dabimus geminae praecepta Minervae,  
 Quae Romana puto Graecaque turba leget;  
 Assiduis quae nunc castigo scripta lituris,  
 Ut valeant doctas non metuisse manus.  
 Te modo, quos dedimus, iuvet hos legisse libellos,  
 Doctior ut posthac cetera nostra legas.

FINIS PARAENESEOS

HESIODUS IN THEOGONIA  
DE NOMINIBUS MUSARUM

Κλειώ τ', Εὐτέρπη τε, Θάλιá τε, Μελπομένη τε,  
Τερψιχόρη τ', Εῤατώ τε, Πολύμνιά τ' Οὐρανίη τε,  
Καλλιόπη θ'· ἥ δ' ἐ προφερεσάτη ἐς ἰν ἅπασων

TRANSLATIO SUPERIORUM CARMINUM

*Clioque, Euterpeque, Thaliaque, Melpomenique,  
Terpsichoreque, Eratoque, Polymniaque, Uranieque,  
Calliope multo ante alias praestantior omnes.*

ALDUS MANNUCCIUS BASSIANAS LATINUS

CATHARINAE PIAE

PRINCIPI CLARISSIMAE AC PRUDENTISSIMAE

S. P. D.

**Q**UANTI apud me sint Albertus Leonellusque  
liberi tui, quos nuper mihi erudiendos tra-  
didisti, atque quanto ego amore, quantaque eos  
benivolentia prosequar, potes vel ex hoc facile  
perspicere, Catharina Princeps, Heroidum aeta-  
tis nostrae longe prudentissima (2), quod pa-  
rum illud quod datur otii; nam multis negotiis  
impeditus vix quatuor horas ad summum sup-  
peditare quotidie meo studio possum; non ad  
meam utilitatem, ut sane plerique facerent, le-

gendo consumo; sed in aliquo potius scribendo componendoque opusculo in disciplina grammatices, quod sit erudiendis liberis accommodatum: quod si ita est, nec ne, alter qui melius sciat, quam tu, non facile inveniri potest.

En de accentibus et Latinis et Graecis opusculum, quod nuper conscripsimus, tibi que donavimus, ut a te pueris non modo legendum, sed etiam ediscendum offeratur et donetur tuis: quae cum digna mihi res, tum ipsis pernecessaria videbatur; non enim parum fructus et splendoris habet secundum accentus recta pronuntiatio et moderatio dictionum: qua cum indigere liberos tuos animadverterem, ipsis deesse non volui, qui de accentu scriberem aliquid, quod ad evitandum barbarismum magno eis adiumento foret: in qua re conficienda quantum laboris et difficultatis sustinuimus, quoniam opus fuit ut plurimos et Graecos et Latinos libros evolveremus, ipse mihi sum optimus testis: certe multum elaboravimus.

Conscripsimus perpaucis ante diebus grammaticas Latinae linguae Institutiones, nec non de componendis carminibus opusculum, panagyricos quoque Musarum versus, quos illae de Alberti laudibus alternis concinunt: quibus omni-

bus, ut nosti, donavimus Albertum nostrum, adiuncto etiam libello Graeco, ut Graecas etiam litteras una cum nostris edisceret, itaque pariter iret, ut neutra lingua, quemadmodum praecipit Quintilianus, alteri officeret (3). Quod eo etiam feci libentius, quoniam tibi praecellenti ingenio Principi, atque habenti cum plurimis in rebus, tum in re quoque litteraria et acce et subtile iudicium, gratissimum me facturum sciebam, si clara et egregia indole praeditis, et te clarissima matre sane quam dignis pueris tuis aliquem libellum Graecum tanquam isagogicum scriberem; quos tu non exculta solum, sed perfecta quoque litteratura fore desideras; quam nemini ex hominibus nostris absque aliqua Graecarum litterarum cognitione, mira quadam tui ingenii bonitate, cognoscis non posse contingere, contra quorundam indoctorum hominum stultam opinionem, qui nihil aut certe parum existimant necessarias esse Graecas litteras hominibus nostris; qui quam recte sentiant, viderint qui intelligunt: certe errant vehementer. Quomodo enim qui Graece nescit Graecos imitari auctores potest, in omni disciplinarum genere quam doctissimos? a quorum fontibus quicquid fere est laude dignum in linguam Latinam constat



derivatum; qui tanta elegantia, tanto artificio, tam mirabili subtilitate omnia tractaverunt, ut Flaccus in Arte Poetica Graecos non iniuria admiratus, sic de Graecorum ingenio scripserit:

*Graiiis ingenium, Graiis dedit ore rotundo*

*Musa loqui, praeter laudem nullius avaris.*

Et in eadem:

*Vos exemplaria Graeca*

*Nocturna versate manu, versate diurna.*

Accedunt nostrae sententiae alii plurimi, tam humilior, quam antiquae aetatis, et docti et clari viri. Sed, ut novos missos faciamus, nonne M. Fabius Quintilianus, Latinae linguae peritissimus, hoc idem in primo De Oratoria Institutione sentire videtur, cum dicit (4): *A sermone Graeco puerum incipere malo, quia Latinus compluribus in usu est, vel nobis nolentibus se perhibet: simul quia disciplinis quoque Graecis simul instruendus est, unde et nostrae fluxerunt?* Et paulo post subiungit: *Non longe itaque Latina subsequi debent, et cito pariter ire. Ita fiet ut cum aequali cura linguam utramque tueri coeperimus, neutra alteri officiat.* Nonne etiam Priscianus grammaticorum omnium, meo quidem iudicio, accuratissimus confirmat sententiam nostram? qui librum suum, qui est the-

saurus grammaticae disciplinae, hoc modo incoepit: *Cum omnis eloquentiae doctrinam et omne studiorum genus sapientiae luce praefulgens, a Graecorum fontibus derivatum, Latinos proprio sermone invenio celebrasse, et in omnibus illorum vestigia consecutos artibus video, etc.* postea subiungit: *conatus sum pro viribus meis Graecorum praecepta virorum, quae congrua visa sunt, in Latinum transferre sermonem.* Quid dicam de Cicerone nostro, doctissimorum quidem omnium consensu parente Romanae eloquentiae? qui Athenas omnium liberalium artium inventrices dixit, quique in eo libro qui est scriptus ad Marcum Ciceronem filium de Officiis, cum philosophiae Athenis incumberet sub Cratippo principe illius aetatis philosophorum, filium, ut cum Latinis Graeca coniungeret, quoniam conducirer plurimum, suo exemplo sic monuit: *Tamen ipse ad meam utilitatem semper eum Graecis Latina coniunxi; neque id in philosophia solum, sed etiam in dicendi exercitatione feci: idem tibi censeo faciendum, ut par sis in utriusque orationis facultate.*

Vide igitur quam recte tu sentias, acri ingenio Princeps, atque magnum clarae et magnificae tuae gentis decus, Catharina Pia, si li-

beros tuos non Latine solum, sed etiam Graece scire desideras, multorum exemplo et clarorum virorum. Adde quod quantum divitiis et dignitate, tantum moribus et doctrina vis eos ceteris praestare hominibus; nec imitandos esse ducis nostrae aetatis principes, qui quanto digniores potentioresque sunt, eo etiam a bonarum artium disciplinis magis alieni. Non sic Romanos illos rerum dominos, non ipsos barbaros quondam, quos tu dignos imitatione existimas, fecisse constat. Illi quidem liberalibus disciplinis eo ardentius maioreque animo incumbabant, quo et ditiores et digniores erant: quod cum alii innumerabiles viri, tam clarissimi, quam potentissimi facere consueverunt, tum Ptolemaeus ille Philadelphus, vir quidem doctissimus, qui etiam bibliothecam nominatissimam fecit; atque etiam Mithridates rex Ponti, qui duarum et viginti gentium, quas sub ditione habuit, linguas percalluit; quemque medicinae rei perquam peritum fuisse commemorant; unde adhuc huius regis antidotus celebratissima est, quae Mithridatios appellatur.

His adde Philippum Macedoniae regem, qui quanquam omni ferme tempore negotiis belli victoriisque affectus exercitusque esset, a liberali

tamen Musa et studiis humanitatis nunquam abfuit; immo tanti faciebat bonas litteras, ut ad Aristotelem philosophum, nato sibi Alexandro, qui a rebus magnifice gestis Magnus postea cognomento est appellatus, sic scriberet:

Φίλιππος Ἀριστοτέλει τὸ χαίρειν. Ἰσθι μοι γεγονότα υἱόν. πολλὴν ἔν τοις θεοῖς χάριν ἔχω, ἃς ὕτως ἐπὶ τῇ γένεσι τοῦ παιδὸς, ὡς ἐπὶ τῷ κατὰ τὴν σὴν ἡλικίαν αὐτὸν γεγονέναι· ἐλπίζω γάρ, αὐτὸν ὑπὸ σὺ τραφέντα καὶ παιδευθέντα, ἄξιον ἔσεσθαι καὶ ἡμῶν καὶ τῆς τῶν πραγμάτων διαδοχῆς.

Quod sic exponi Latine potest

*Philippus Aristoteli S. P. D.*

*Scias mihi natum esse filium: quare Diis habeo gratiam, non solum quia natus est, verum etiam quia eum nasci contigit temporibus tuis; spero enim ipsum a te eductum eruditumque et nobis et rerum nostrarum successione dignum futurum.*

Vide quanti a rege illo potentissimo prudentissimoque doctrina ac virtus aestimabatur; quod ob id potissimum sibi natum esse filium gaudebat, quoniam doceri ab Aristotele posset, qui floruit temporibus illis.

Nec tamen ipse Alexander omittendus est, qui fuit et patre Philippo dignus filius, et Aristote-

le praeceptore discipulus; qui copiis ne, atque opulentiis, an doctrina ceteros anteire maluerit, ostendit his verbis in epistola ad praeceptorem :

Ἀλέξανδρος Ἀριστοτέλει ἐν πράττειν . Οὐκ ὀρθῶς ἐποίησας , ἐκδὲς τὴς ἀκροαματικῆς τῶν λόγων . τίτι γὰρ ἐστὶ διοίσομεν ἡμεῖς τῶν ἄλλων , εἰ καθ' ἑς ἐπαιδεύθημεν λόγους , ἐτοί πάντων ἔσονται κοινοί ; ἐγὼ δὲ βελομένην ἀνταῖς περὶ τὰ ἄριστα ἐμπειρίαις , ἢ ταῖς δυνάμεισι διαφέρειν . ἔρρωσο .

Paraphrasis superioris epistolae

*Alexander Aristoteli S. D.*

*Libros de Auscultatione Physica edidisse te sane moleste fero . Nam in qua item re erimus nos praestantiores ceteris , si eas , quibus eruditi sumus , disciplinas , communes omnibus feceris ? Malim equidem optimis disciplinis omnes , quam facultatibus , antecellere . Vale (5) .*

Magnifica quidem vox, et Alexandro invictissimo rege et sapientissimo digna; qui divitias virtute multo inferiores esse putabat.

Quid dicam de Romanis nostris? et de Iulio Caesare in primis, qui aequae in litteris atque in armis claruit: quod ita sit, an minime, testes sunt eius commentarii, quos ille fecit rerum sua-

rum, ut relinqueret materiam volentibus de se scribere; sed tantae eloquentiae habiti sunt, ut nemo illos nec mutare, nec aliquid illis addere, aut minuere ausus sit. Quid item de L. Crasso Muciano? quem Romanae historiae scriptores quinque rerum maxima habuisse tradunt; quod esset ditissimus, quod nobilissimus, quod eloquentissimus, quod iurisconsultissimus, quod pontifex maximus. Quid de Cn. Planco? quem eius epistolae ad Ciceronem indicant fuisse non minus eloquentem, quam Cicero ipse fuerit. Quid de Asinio Pollione, de Mecoenate, de Augusto Caesare, deque multis aliis? quos enumerare tum difficile, tum etiam supervacaneum esset; qui etsi erant nobiles et clarissimi viri ac principes, tamen et litteris accurate operam dabant, et studiosos viros ita fovebant atque suis opibus adiuvabant, ut plerosque temporibus illis ex infima fortuna claros admodum et poetas et oratores evasisse latissime pateat, necnon in ordinem senatorium atque ad summos honores processisse.

Nostro autem tempore unum tantum vidimus, qui nuper excessit e vita, Federicum Urbini Ducem (6), qui pariter et armorum et liberalium disciplinarum gloria excelluit; quique bonas ar-

tes tanta fuit benivolentia prosecutus, quod bibliothecam etiam quam magnificentissimam sibi construxit; in qua quidem comparanda circiter quadraginta millia nummum aureorum exposuit, longe etiam plura impensurus, nisi illum mors crudelis et inexorabilis invidisset hominibus studiosis. O iacturam grandem, o factum male, o damnum irreparabile! Tantum profecto hominem mori nunquam oportuisset, quem quidem unum ex principibus nostra aetate doctissimum exstitisse mirabile est. Quanquam illum Ioannēs Picus (7), Princeps inclytus, germanusque tuus, longe quidem doctrina et bonarum artium cognitione antecellit; qui est tanto ingenio, tantaque doctrina, ut se iam toti orbi notum fecerit. Non licet hoc loco, ubi de principibus sermo est in omnium bonarum artium disciplinis egregius, qui temporibus nostris pauci admodum sunt, Petrum Baroccium (8) praeterire, patricium Venetum perquam nobilem, ac Patavinum Episcopum, summa veneratione summoque honore dignissimum; cuius laudum principium facile quidem inventu est, exitus vero apprime difficilis. Hic profecto Romanae linguae sane quam doctus, si prosa oratione scribit, copiosus est, ornatus, gravis; si quando se ad car-

men et mansuetiores Musas refert, tersus est ac dulcis, itaque excultus et doctus, ut cum antiquis quoque illis doctissimis certare videatur: est etiam medicinae rei et simplicium maxime non ignarus, atque etiam geometra maximus, item in disciplina iuris et pontificii et civilis excellentissimus. Sed sentio quam angusto ambitu orationis summam huius principis doctrinam virtutemque complectar; non enim epistola digna est, sed immenso volumine. Praeterea cum sit summo ingenio princeps, summaque continentia et humanitate; amplius antistes iustissimus, episcopus sanctissimus, in tuenda servandaque Salvatoris nostri Christi Iesu religione aptissimus, accuratissimus, optimus; non a meo ingenio, quod sentio quam sit exiguum, verum a summo, et, quam meum, longe maiore, posteritati tradendus est. Nec item Hermolaus Barbarus (9) patricius Venetus, vir aetate nostra rerum omnium impense doctus, est silentio praetermittendus. Hunc certe L. Crasso Muciano, de quo nuper meminimus, longe quidem rerum maximarum numero praestare facile cognosci potest. L. enim Crassum quinque rerum maxima habuisse, historiae traditum est: Hermolaum vero, bone Deus, non modo quinque, sed etiam bis quin-



que et plura quoque habere conspiciamus. De hoc enim dicere vere possumus, quod sit ditissimus, quod nobilissimus, quod eques clarissimus, quod et Graecae et Romanae linguae peritissimus, quod in cognitione simplicium medicinae excellentissimus, quod item eloquentissimus, quod iurisconsultissimus, quod philosophus maximus, quod astrologus summus, quod inter primos magistratus Venetos ornatissimus, quod homo optimus, quod, etsi iuvenis, etiam castissimus: adde quod Zacharia patre (110), viro dignissimo equiteque illustri ac Marci Evangelistae procuratore integerrimo, filius dignissimus. His atque aliis rerum maximis ornatus Hermolaus, lumen est ac decus Veneti potentissimi illustrissimique Senatus.

Tu autem cum ea sis quae et virtutem diligas mirum in modum, et nihil cupias magis, quam ut optimum quemque atque doctissimum virum sibi imitandum liberi eligant tui, seque ad illorum imaginem comparent, qui mirabiliter in laude vixerunt; non dubito quin cum clarissimis atque iis, quos connumeravimus, viris sint merito conferendi. Quamobrem perge, ut coepisti; quandoquidem cum prudentia tua, quae est quidem maxima, tum his filiis, superabis

omnium fortunas: me autem, ut de me loquar, habebis, cui aequae cari sint, atque fuerint patri; tibi quoque persuadeas velim, quantum viribus enim, consilio admonere, studio et doctrina iuvare potuero, hoc commune Alberto Leonelloque magnificis liberis tuis semper futurum. Vale.

ALDUS MANNUCCIUS BASSIANAS LATINUS

ALBERTO PIO PRINCIPI CARPENSI

S. P. D.

**C**um xenia, o Princeps, Romani, Alberte, quotannis  
 Hospitibus brumae tempore rite dabant;  
 Reddideras et tu, sanctissime Iane, Calendas,  
 Anni qui finem principiumque vides.  
 Hic mittebat aprum, qualis Diomedis in agro  
 Occidit: hic foetae pignora parva suis:  
 Ille dabat capreas, lepores, damasque fugaces,  
 Laetas, cum pingui sumine, cortis aves.  
 Mitti et consuerat ventri lactuca movendo,  
 Rapaque brumali grandia facta gelu.  
 Dulcia mittebant alii farcimina: laetos  
 Sic ducebat avos ebria bruma meos.  
 Sic te, magne puer, Carpum Novumque salutet,  
 Oppida quotque tuo sunt tibi cum patruo.  
 Mons tibi boletos mittat, fungosque suillos,  
 Saturnalitios det tibi villa capos.

Nos tibi non dabimus quae pascant dona palatum,  
Mandentur ventri quae peritura tuo .

Mitemus potius pascentia munera mentem,  
Quaeque docent mores, ingeniumque iuvant.

Accipe nunc igitur parvum, mea munera, librum,  
Conscriptum nuper, compositumque mihi.

Hic dabit accentus, geminae moderamina linguae,  
Addictos facili sub brevitate tibi.

Qui si gratus erit, tribuam quae condita servo,  
Et sunt temporibus quae tibi danda suis.

Hunc ubi tu scieris, longe maiora dabuntur  
Dona tibi, pro te quae tuus Aldus habet.

FINIS.

(1) *Albertum Pium Leonelli Principis Car-pensis filium, anno 1475 natum, tutelae Mar-ci consanguinei testamento patris relictum, Aldus a puero instituit, iamque Carpi degens vix quinquennem litteris erudire coepit: alii deinceps, quos inter Marcus Musurus, Trypho Dalmata, Gregorius Spoletanus, Ioannes Genesius Sepulveda, Coelius Calcagninus, Lilius Gregorius Gyraldus, Laurentius Maiolus, Petrus Pomponatius, vel praeceptores, vel studiorum adiutores, domi Ferrariae et alibi accessere. Inter viros aetatis suae principes is eximie litteris floruit: at non itidem fortuna, quam adversam tota fere vita expertum esse, cum ex aliorum scriptis, tum praesertim ex accuratissima Tiraboschii de eo enarratione cognoscere nullo negotio licet (Biblioteca Modonese T. IV. p. 156). Albertus Aldo munificentissime favit, opes, praedia, auxilia multa ad libros imprimendos academiamque constituendam abunde tribuit, ac vel ipso quoque gentis suae nomine eum honestavit. Aldus vicissim animo deditissimo Alberto haesit, librisque pluribus inscriptis laudes eius gratique animi sui sensus uberrime explicavit; Aristotelis nimirum ac Theophrasti operibus ann.*

1494 et 1497, *Procli Sphaera* an. 1499, *Lucretio* an. 1500, *Ioannis Francisci Pici libello de Imaginatione* an. 1501, *Ammonii aliorumque Commentariis in Aristotelem de Interpretatione* an. 1503, *Ioannis Grammatici Commentario in eiusdem Analytica posteriora* an. 1504, *Alexandri Aphrodisei Commentario in eiusdem Topica* an. 1513, iterumque *Lucretio* an. 1515. Mense Ianuario huius anni cum *Lucretium* demum inscriberet, sic eum alloquebatur: Iampridem, Alberte decus Principum, decus huius aetatis eruditorum, constitui omnes de philosophia libros, quotquot ex aedibus nostris exirent in manus studiosorum, tibi dedicare, tum mea erga te singulari benevolentia, tum etiam quia id genus libris praeter ceteros delectaris. *Haec Aldus aeger morbo extremo cum laboraret, immo appropinquans morti scribebat; mense siquidem ipso tabulas supremas condidit, a Zacharia typis editas* (Biblioteca di Storia Letter. T. III. P. I. p. 378), *quibus cadaver suum transferri Carpum, ibique ex libito Alberti et Leonelli eius fratris, et ipsi sui iam discipuli, sepeliri iussit; proximi vero mensis initio cum vita excessisset, factum eius voluntati satis fuisse videtur. Rei*

*monumentum nunquam cognitum, quod ipsum etiam de Aldi funere nova quaedam prodit, ex Diariis rerum sui temporis, autographis, iisque ineditis, Marini Sanuti patricii Veneti, a me magno iam studio inspectis, proferre lubet.*

1515. 8. Febbraro. In questa mattina essendo morto za do giorni qui Domino Aldo Manutio Romano optimo Humanista et Greco, qual era zenero di Andrea di Axola stampador; il qual ha fatto imprimer molte opere Latine et Greche ben corrette, et fatto le epistole davanti intitolate a molti, tra le quali assai operette a mi Marin Sanudo dedicò; et compose una Gramatica molto eccellente. Hor è morto, stato molti zorni ammalato: et per esser sta preceptor di Signori de Carpi, et fatto della casa di Pii, ordinò il suo corpo fusse portato a seppellir a Carpi, et la moglie et figliuoli andassero ad habitar ivi, dove quelli Signori li dettano certe possessioni. Et il corpo in chiesa di San Paternian posto con libri attorno, ivi fu fatto le exequie et una Oration in sua laude per Raphael Regio Lector Pubblico in questa città in Humanità; et il corpo posto poi in un deposito fino si mandi via.

(2) *Catharina Ioannis Francisci Pici Principis Mirandulani filia, Ioannis doctrina celeberrimi soror, Leonelli Pii Principis Carpensis uxor, Alberti et Leonelli mater, marito anno 1477 vita functo, Rodolpho Gonzagio postmodum nupsit; eoque in praelio ad Tarum fluvium anno 1495, eum pro Venetis pugnaret, interempto, iterum vidua remansit. Non unus eam Aldus impense commendat: Ludovicus quoque Areostus carmine ad Albertum filium, cum ceteris suis edito, quo extinctam deflet, prudentiae, gravitatis, formae, pudicitiae, leporis in dicendo, comitatisque nomine, laudibus cumulat. Itaque erroris turpissimi Sansovinum et alios, qui eandem a Gonzagio in adulterio deprehensam morte affectam dixerent, Tiraboschius recte arguit (Bibl. Modon. T. IV. p. 158.).*

(3) *De Accentibus Graecis et Latinis Aldi praecepta patent in eius Institutionibus grammaticis linguae utriusque impressis: opusculum seorsim de iisdem conscriptum hoc uno ex indicio est notum. In grammaticis Latinae linguae Institutionibus scribendis Aldum diu multumque repetito studio elaborasse, testis ipse est; namque hic primo a se iam scriptas di-*

xit, postea libro tertio, de syllepsi disserens, rei anno 1492 peractae mentionem ingessit, neque tandem, nisi anno 1501, in lucem emisit. Fides itaque habenda esse plane videtur Erasmo adversus Albertum Pium Aldi defensorem scribenti (Apolog. adv. XXIV. libros Alberti, Oper. T. IX. pag. 1136.): „*De AL-*  
 „*do nihil aliud habet Moria, quam haec ver-*  
 „*ba: Quandoquidem Aldus meus unus plus*  
 „*quinquies Grammaticam dedit. Mira irrisio!*  
 „*At ipse Aldus mihi fassus est se novies scri-*  
 „*psisse Grammaticam*“. Graecae linguae Institutiones multo itidem tempore Aldum fecisse, ex eo perspectum est, quod easdem iam tum castigaret, cum paraenesim ad Albertum Pium scriberet, moriens autem adhuc ineditas reliquerit: quas anno demum 1515 Marcus Musurus evulgavit. Sane grammaticis linguae utriusque studii operam Aldus impense dedit, doctrinaque ab antiquis praesertim scriptoribus hausta, multo maiorem auctoritatem, quam alii a nostris hominibus editi commentarii obtinuissent, suis conciliavit. Neque tamen omnia quae de rebus eiusmodi scripsit etiam typis dedit. Fragmenta Grammatica sua quoad pronunciationem, velut editioni parata, libro Gram-



*maticae Latinae tertio, ubi de nominibus patronymicis tractat, in Appendice operis eiusdem, ubi de diphthongis improprie dictis, et in Parergo de vitiata vocalium ac diphthongorum prolatione, ipse affert: sed Paulus filius in epistola ad Marium Corradum ¶1. Id. Nov. MDLXV. de iis iam scripsit: Fragmenta patris mei, quod requiris, apud me nulla sunt: furto ablata, quo ille tempore vita excessit, creditum est. De Diphthongis Graecis ad Christophorum Fulginatam exstitit quoque Aldi opusculum Patavii inter codices manuscriptos Laurentii Pignorii, a Tomasino relatum in eius bibliothecae et musei Descriptione, Venetiis an. 1632 impressa (p. 26.). Opusculum de componendis carminibus, fortasse deperditum, quod a se scriptum Aldus hoc loco innuit, nemo conquiret, qui ab eo abunde tradita libro Grammaticae Latinae quarto et commentariolo de metris Horatii noverit. Libellum Graecum isagogicum nemo praeter ipsum indicasse videtur: at Graece scribendi facultatem eidem familiarem fuisse, tum ex aliis, tum potissimum ex Grammatica Graeca, ea ipsa lingua conscripta, exploratum est.*

(4) *Quintiliani aliorumque veterum scri-*

ptorum testimonia, iuxta lectionem tempore suo receptam ab Aldo allata, itidem ego quoque repraesento.

(5) *Philippi et Alexandri Epistolas Gellius lib. ix. cap. 3. et lib. xx. cap. 5. Noctium Atticarum retulit: posteriorem Plutarchus quoque in Alexandro, ac Themistius in praefatione ad Aristotelis libros de physica auscultatione dedere. Utramque in collectione Epistolarum Graecarum, an. 1499 impressa, Aldus protulit.*

(6) *Federicum Feretrium Urbini Ducem bonis artibus, studiis, moribus, virtutibus, dictis, factisque clarissimum, qui historiam rerum Italiae sui temporis vix attigerint, facile norunt. Bibliothecae locupletissimae ab eo institutae Bembo Cardinalis meminit, his Ludovici Odaxii, in laudatione funebri Guidi Ubaldi eius filii, verbis: Iam bibliotheca illa celebri, quam is maximis sumptibus comparavit, cum Latinorum, tum Graecorum, tum Etruscorum, tum etiam Hebraeorum lingua perscriptis, in omni disciplinarum genere libris monumentisque referta, omnes qui volumus utimur. Leander vero Albertus in Descriptione Italiae haec ad rem habet (p. 262. ed. Bologna 1550):*

Ornò Urbino di belli edifizii, e massimamente di quel sontuoso palagio, ove fece una superba Libreria, mettendovi dentro gran numero di preziosi libri, copertati e ornati d'oro d'argento e di seta; che era cosa maravigliosa da vederli, come io vidi, avanti che Cesare Borgia s'insignorisse di Urbino: i quali libri furono portati in qua e in là, nel tempo di detto Cesare Borgia: e così è stata rovinata tanto degna opera. *Ingentes attamen et valde pretiosae reliquiae ad annum usque 1658 Urbini remanserunt; quas in bibliothecam Vaticanam transferri Alexander VII. Pontifex Maximus curavit; Aedes illas imaginibus virorum omnis aevi doctissimorum Federicus exornavit, et inscriptiones apposuit, a Schradero in Monumentis Italiae an. 1592 Francofurti impressis, et a Chytraeo in Deliciis Itinerum Europae an. 1599, ac Swertio in Selectis Christiani orbis Deliciis an. 1608, denuo allatas; in iisque etiam Victorino Feltrensi Praeceptoris sanctissimo, ob humanitatem, litteris exemploque traditam, honorem tribuit.*

(7) *Ioannes Picus quanta doctrina esset, Aldus optime noverat, utpote qui etiam domicilio secum aliquandiu Mirandulae usus fue-*

rat, socio Emanuele Adramyteno, et ipso litterarum suarum apprime docto (Aldi epist. ad Ang. Politianum): nunquam igitur, nisi cum laude, viri praestantissimi nomen usurpat; qui, ut Politianus inquit, tam multis unus bonis abundabat, ut unus omnium laudes exhauriret (Epist. ad Baccium Ugolinum). Bibliothecae ab eo quoque institutae, libris manuscriptis Hebraicis, Chaldaicis, Graecis, Latinis, aliisque refertissimae, fata primum prospera, miserrima postmodum fuere. Ioannes Franciscus Picus Ioannis nepos in fine operis de Providentia, anno 1508 in suburbio Novi sub Alberti Pii Carpi Domini ditione typis editi, haec ad Dominicum Grimanum Venetum Cardinalem habet: Plura fortasse reponerem, si et otium animo et quies daretur corpori, si amplissimae quoque tuae bibliothecae copia mihi patuisset. Cui, postquam eius, quae Ioannis Pici patru mei fuerat, ab Antonio itidem patruo, cui testamento obvenerat, ipsi tibi, me (fateor) non consulto, (quis enim eam sibi iure non malit?) venditae, facta est accessio, et numerus inde auctus ex omnis generis voluminibus, quae tibi magna cura sumptuque conquiris, facile continget, ut eam, quae Osymanduae, aut Ptole-

maei fuerat, posterì minime desiderent. *Iis potissimum Pici codicibus bibliothecam Venetiis in aedibus D. Antonii, quam Canonici Sancti Salvatoris incolebant, Grimanus Cardinalis constituit; cuius divitias Augustinus Steuchus ex iis Canonicis unus in epistola, qua Recognitionem Veteris Testamenti ad Hebraicam veritatem anno 1529 Marino Grimano Cardinali inscripsit, ita commendabat: Tu patruusque tuus Dominicus Grimanus et ipse Cardinalis, collectis ex miserabili naufragio pretiosissimis libris, qui toto orbe terrarum dispersi, vel in tenebris delitescabant, vel proximum eorum ab igne vel alio casu impendebat exitium, magnaque ex omnibus linguis facta caterva, praeclaram et cui forte nulla secunda sit toto orbe Christiano, bibliothecam in aedibus Sancti Antonii Venetiis erexistis; in quibus libris sine dubio Religionis nostrae decus et dignitas conservatur et viget. Index codicum Hebraicorum linguarumque aliarum, saeculo XVI confectus, cuius meminit Apostolus Zenus (Annotaz. alla Bibl. Ital. del Fontanini T. II. p. 233.), in eius bibliotheca superest: Graecorum alium valde copiosum, anno 1528 Venetiis a Martino Richtero scriptum, ut cognoscerem, Ca-*

*ietanus Marinius Custos primus bibliothecae Vaticanae humaniter fecit: ex iis paucos Latinosque plures, a Tomasino in Bibliothecis Manuscriptis Venetis relatos cognoscere quisque potest: neque usum eorundem in editionibus a doctissimis viris saepe factum homines huiusmodi rerum periti ignorant. At vero tanta bonorum librorum copia, anno 1685 a Mabillonio inspecta, saeculo eo ipso exeunte, incendio miserabiliter periit.*

(8) *Petrum Baroccium doctrina multiplici fuisse instructum, non tam ex libris eius vulgatis, quam ex fide scriptorum sui aevi praestantium, Aldique ipsius testimonio, tenemus. Ingentem mathematicis disciplinis operam navavit assidue, ut non tantum quae arithmeticae, musicae, astronomiae, geometriae dogmata tradiderint alii brevissimo temporis curriculo didicerit, tenaciter memoriae commendaverit; verum etiam quae tot retro saeculis nunquam visa fuerint investigaverit, invenerit, et stabilissima ratione monstraverit. Circularis siquidem figurae quadrationem nemo est qui ad haec usque tempora novisse professus sit. . . . hic vero solus divino sui ingenii acumine ædinvenit, scivit, et apertissime docuit: quam ei laudem Christopho-*

*rus Marcellus in Oratione funebri tribuit . Petrus Pomponatius virum in mathematicis artibus universaliter et apprime doctum dixit ( De Incantatione p. 57. ed. Basil. 1567 ) . Medicinae peritissimus , pharmacum in arthritidis curatione adhibendum invenit : rem autem herbariam ita calluit , ut , Nicolao Leoniceno teste , quemadmodum in omnium bonarum artium disciplina eminentissimus , ita in hac quoque medicinae parte neque ipsis medicis inferior esset ( De Plinii et alior. in Medic. erroribus ) . Litteris humanioribus admodum excultum fuisse , monumenta utroque scribendi genere edita iam ostendunt . Ad eum itaque Ioannes Antonius Flaminius scribere non dubitavit : Nec enim quempiam video ex iis quos nostra haec tulit aetas , quem tibi in rerum humanarum ac divinarum scientia praeferam ( Epistolar. p. 164 ) . Mazzucchellii studio , quae ille gesserit atque scripserit , cognoscere facile est . Addendum tamen , libros eius tres ineditos De factionibus extinguendis et civibus in gratiam pristinam revocandis continendisque , in bibliotheca Regia Londinensi superesse ( Casley Catalogue of the King' s Library . London 1734. 4<sup>o</sup> p. 202 ) ; et Basiliæ Magni Vitam ex Graeco Latine ab*



*eo redditam in codice autographo apud Petrum Catharinum Zenum Clericum Somaschensem olim existisse, et in apographo apud me exstare. Lucretium, cuius indicium Iohannes Antonius Vulpius in secunda poetae editione dedit, et Sedulium Iuencium ac Aratorem, ab eodem exscriptos in bibliotheca Canoniconum Patavii iam vidi: at eximii viri Vitam a Michaele Baroccio eius gentili, ex fide Sansovini scriptam (Venezia descritta p. 261. ed. 1581), nunquam videre memini. Epiphanii Homiliam de Christi sepultura a Baroccio Latine expressam in codice Casinensi Mabillonius offendit; qui eiusdem Epistolas a Petro Delphino Ordinis Camaldulensis Praeside illius amico iam collectas et editioni paratas reperire maluisset (Iter Italic. p. 204).*

(9) *Quamvis de Hermolai Barbari rebus gestis et scriptis multi, ac praesertim Apostolus Zenus et Mazzucchellius disseruerint; commentarius tamen absolutus, et viro eo undequaque praestantissimo aequalis necdum ab ullo prodiit. Quoad studia litterarum in adolescentia peracta, ex tabulariis gymnasii Patavini mihi constat, anno 1474 in eo laurea philosophica donatum fuisse, ac triennio post*



*iurisprudentiae insignia suscepisse; ethicam vero anno illo 1474 ac sequenti inibi esse professum, secus atque scriptores etiam probatissimi memoriae prodiderint. Ex eius epistolis maximam partem ineditis, quarum duo potissimum volumina a Zeno relata, nunc vel perdita vel abdita, ego quoque iamdiu versavi, multa ad commentarium conficiendum equidem suppeterent. Scriptae eae sunt ab anno 1483 ad 1488, Georgio Merulae, Hieronymo Balbano Lucensi, Bernardino Crasso, Bartholomaeo Furnio Genuensi, Leonardo Montagnae Veronensi, Marsilio Ficino, Laurentio Mediceo, Baptistae Guarino, Augusto Baldo Patavino, Ioanni Antonio Pantheo Veronensi, Petro Guevarae, Ioanni Pico, Eliae Iudaeo, Iacobo Antiquario, Arnoldo Gandavensi, Nicolao Verniae Theatino, Ludovico Odaxio Patavino, L. Æmiliano Cimbriaco, Laurentio Abstemio, C. Pontico Facino, Lippo Brandolino, Aristophilo Romano, M. Antonio Sabellico, Antonio Bracello, Francisco Gaddio, Michaeli Carrariensi Bergomati, aliisque; nec non Antonio Calvo, Bernardo Bembo, Bertuccio Georgio, Antonio Mulae, Antonio Bolduo, Dominico Mauroceno, et*

*Hieronymo Donato patriciis Venetis . In exemplis librorum Graecorum sibi conficiendis virum doctissimum operam quoque ponere, consuevisse, Athenaei codex Parisiensis, a Schweighaeusero potissimum adhibitus, demonstrat; itidemque alius Dionysii Halicarnassensis opuscula de scriptoribus Graecis et Demetrium Phalereum de Elocutione complectens, partim a Barbaro, litteris valde minutis, partim a Thoma Didymo Zenotele Fertino eius librario exaratus; quem cum Stephano Byzantino de Urbibus, a Zenotele Fertino eius librario exaratum in bibliotheca domestica habeo. Imaginem Barbari, habitu patricii Veneti, a Victore Carpacio in aedícula D. Ursulae Venetiarum depictam Pierius Valerianus eleganti carmine denotavit (Hexametri etc. p. 123. t.): de pictura in aede Romana exhibita id Zenus perperam intellexit.*

(10) *Zachariae Barbari nomen Mazzucchellius aliquantulum illustrat, cum de Hermolao filio scribit. Addere mihi licet, apud virum nobilitate, rei bibliographicae peritia, librisque raritatis eximiae sibi comparatis spectatissimum, Aloisium Serram Cassani Principem codicem manuscriptum exstare; cuius no-*

*titiam in Indice manuscripto librorum ipsius  
hisce verbis factam fuisse vidi : Francisci Bar-  
bari et Andreae Contrarii Epistolae . Praecedit  
Vita Francisci Barbari per compendium deliba-  
ta . Codex membranaceus elegantissime conscrip-  
tus et figuris ornatus , cum initialibus vario co-  
lore depictis et deauratis , scriptus manu Ioannis  
Cynici Parmensis , in gratiam Ferdinandi Ara-  
gonii Regis , eidemque a Zacharia Francisci Bar-  
bari filio dedicatus , cuius stemma exstat in a-  
versa pagina depictum et deauratum , in folio .*

## ALDI ROMANI IN VENEREM

**S**i Venus haec Superos peteret, parvusque Cupido,  
 Quanta olim in terris, maxima rixa foret.  
 Nam dea se Venerem vera contenderet: haec se,  
 Quae nata ex spumis est maris, esse deam.  
 Haec eadem facerent Amor hic, Amor ille; nec ipse  
 Finiret litem Iupiter hanc dubius,

*Latinae poeseos ab Aldo excultae monumenta exstant carmina ad Albertum Pium, epigrammata nonnulla suis Grammaticae linguae illius Institutionibus interiecta, hexametri versus pro epitaphio Herculis Strotii, cum Strotiorum poematibus an. 1513 in Aldi officina impressis editi, alique perpauci Aldinis praesertim libris inserti. Quod iis modo accedit, epigramma, ad opus eximium sculpturae, Veneris cum Cupidine ludentis, laude extollendum Aldus fecisse videtur; ac id forte Venetiis, ubi iam ab ipsa litterarum et artium instauratione monumentorum veterum magna semper copia exstitit: immo vero signum idem Aldus videre et laudare potuit, de quo, multo post in museo Ioannis Grima-*

*ni Patriarchae Aquileiensis a se viso , epigramma lusit Nicolaus Grudius Nicolaius inscriptum In statuam Veneris atque Cupidinis, quae visitur Venetiis in palatio Patriarchae Aquileiensis , inter Poemata trium fratrum Belgarum etc. a Bonaventura Vulcanio an. 1612 Lugduni Batavorum editum . Graecam quoque poesim Aldus attigit : quod eius epigrammata duo declarant , cum Organo Aristotelis ac Thesauro Cornucopia Hortisque Adonidis anno 1495 et sequenti impressa .*

# ΝΕΑΚΑΔΗΜΙΑΣ ΝΟΜΟΣ

**Ε**πειδὴ πολλὰ, καὶ ὀφείλιμα τοῖς περὶ παιδείαν ἐσπου-  
 δακόσι παραγίνεσθαι πέφυκεν ἐκ τῆς Ἑλληνικῆς ὁμι-  
 λίας, δίδοκται κοινῇ τοῖς τρισὶν ἡμῖν, Ἀλδφ τῷ  
 Ρωμαίῳ, Γωάννῃ τῷ Κρητῇ, καὶ τρίτῳ ἐμοὶ Σκιπίω-  
 νι τῷ Καρτερομάχῳ, νόμον θέσθαι, μὴ ἄλλως ἐξῆναι  
 ἀλλήλοισ ὁμιλεῖν, εἰ μὴ τῇ Ἑλλάδι φωνῇ. εἴ τις δὲ  
 ἄλλως διαλέγοιτο ἐν ἡμῖν, ἢ ἐξεπίτηδες, ἢ μὴ προ-  
 νοόμενος, ἢ καὶ αὐτῷ τῷ νόμῳ ἐπιλαθόμενος, ἢ κατ'  
 ἄλλην τινὰ τύχην, ζημιόσθω ζημίᾳ, εἰ μὴ ἄρα τις  
 ἐπιτηδέων ἐξαμάρτοι καὶ τῷτο. καταβαλέτω δὲ ὁ ἐ-  
 ξαμαρτῶν τὸ ἐπιτίμιον εὐθύς, μὴ δ' αναβαλέσθω ἐς τ'  
 αὐρεον, ἢ ἐς τ' ἐννεφιν· μὴ ἀποτίσας δὲ, διπλασίον  
 ὀφειλέτω. μὴ δὲς δὲ καὶ τῷτο, τέτραπλάσιον, καὶ  
 κατὰ λόγον αἰ τῆς υπερβίσεως ἐισπραττέσθω. ὀλιγω-  
 ρῶν δὲ τῷ νόμῳ, ἢ καὶ τῷ ἐκτίνειν ὑπερδῶν, τῷ κοι-  
 νῷ τῶν Ἑλληνιστῶν ἀπελαυνέσθω, καὶ τῆς τῶν σπουδαί-  
 ων ὁμιλίας ἀπαξιάσθω, καὶ τὸ ἀπὸ τέσσε ἀποφράς νο-  
 μιζέσθω τὸ πῶ τοιούτω ἀπάντημα· ἐμβεβλήσθω δὲ τὸ  
 καταβαλλόμενον ἀργυρείδιον ἐκάσποτε εἰς βαλάντιόν τι,  
 ἢ καὶ, νῆ Δία, πυξίδα, εἰς τῷτο μόνον ἐκτετορνευ-  
 μένην· αὐτὴ δὲ παραδιδόσθω εἰς φυλακὴν, ἢ ἡμῶν τι-  
 νι, ἢ τῷ χειροτονηθέντι ὑφ' ἡμῶν ὠτινιῶν, καὶ ἀξίῳ  
 κριθέντι, ἐπικεκλεισμένη πρότερον ἐπιμελῶς, καὶ ἐπε-  
 σφραγισμένη ἐς τὸ ἀσφαλέςατον. ὅταν δὲ ἀνοιχθῇναι  
 δοκῇ, εἰς τὸ μέσον προτεθείσθω, καὶ διηριθμῆσθω τὸ  
 νόμισμα· καὶ εἰ μὲν ἱκανόν ᾖ εἰς συμποσίᾳ τιμὴν τε  
 καὶ δαπάνημα, ἐγκειχερείσθω Ἀλδφ τῷ κυρίῳ, ἀφ' ἧ

ἡμᾶς ἐκείνους ἐσιώτῳ λαμπρῶς, καὶ ἔκαστὰ τῆς ἐντυ-  
πωταίς, ἀλλ' ἀνδράσι προπόντως τοῖς τὴν Νεακαδη-  
μίαν οὐνεροπολεῖσιν ἤδη, καὶ Πλατωνικῶς μικρῷ δαῖν  
κατασκευάσασιν αὐτήν. εἰ δὲ μὴ πῶ ἱκανόν τ' ἀργύ-  
ριον εἰς τὸ συμπόσιον, ἐναποθεῖσθω πάλιν εἰς τὴν πυ-  
ξίδα, καὶ ἐναφίεσθω ἕως ὃ τοσούτον ἐνείη τε καὶ ἐγγέ-  
νοιτο, ὅσον ἐξαρκεῖν εἰς τὴν ἐσίασιν.

Εἰς τὸ δὲ μηδένα ἡμῖν συμπόσιον παρελβεῖν, πλὴν  
εἰ ἄρα πῶν φιλελλήνων τινὰ ἐκ ἀνάξιον τῷ χορῷ, τυτέ-  
σιν ἐκ ἁμμοσίων, ἐκ ἁμοίων πῶν Ἑλληνικῶν, καὶ πῶ  
μύγισον, τῆς Νεακαδημίας ἐκ ἀλλόττερον, ἐκ ἁπείρον,  
ἢ δ' ἀμύητον πῶν ἡμετέρων. εἰ δὲ τις ξένος, ἢ πῶν ἐ-  
ξωθεν, οἷα φιλεῖ, ἀφίκοιτό ποτε, καὶ ἐπιδημοίῃ ἐνταῦ-  
θα κατὰ τινα χρεῖαν, εἰ μὲν πεπαιδευμένος, καὶ πῶν  
Ἑλληνικῶν ἐπισήμων, καὶ αὐτὸς ἐνοχλος ἔσω τοῖς ἀνα-  
γεγραμμένοις· ἀντιτείνων δὲ τῷ νόμῳ, ἢ ἐναντιόμε-  
νος, μηδεμιᾶς τυχὼν συγγνώμης, μηδὲ ἀπολογίας τι-  
νός, ἐρήμην ἐνθὺς καταδεδικάσθω, καὶ τῆς Νεακαδη-  
μίας ἐκδεδιώχθω, ἀνάξιος ὢν, καὶ τένταθεν μηκέτι  
εἰσδεδέχθω ἐν ἡμῖν, εἰ μὴ μετανοῶν ἐφ' οἷς ἤμαρτε,  
τοῖς ἁπαλῇ κατασαθεῖσιν ἐμμένειν ὑποσῇ, καὶ ὥσπερ  
ἐγγυητάς κατασῆσθαι. εἰ δ' αὖ τις μὴ εἰδὼς τὰ Ἑλλη-  
νικά, ὥς μὴ πῶ τέτων ἡμμένος, ἢ μὴ ἐπὶ τοσούτον,  
ὥσθ' ἑλληνίζειν δύνασθαι, ἀλλ' ἐν τοῖς τοιούτοις ἐπι παι-  
διδόμενος, ἢ καὶ παιδύεσθαι προθυμύμενος, καὶ ἔτος  
ἐν ἡμῖν ἐξετασθεῖς, ἐθιζέσθω καὶ αὐτὸς κατὰ μικρὸν  
τὰ ὅμοια ἡμῖν ἑλληνίζειν· ἀτακτῆσας δὲ, ἢ καὶ, νῆ  
Δία, καταγελάσας τῆς διατριβῆς, ἀποκεκλείσθω τῷ  
λοιπῷ, μηδ' αὖθις τῆς συνουσίας ἀξιάσθω, μηδ' ἂν πάλιν  
δείκτο.

Η

Εἰσηγήσατο τὸν νόμον Σικιπῖον Καρταρόμαχος, φυ-  
λῆς ἀναγνωσίδος. ἐπιβήφισαν Ἀλδος Ρωμαῖος, ὁ τῆς  
Νεακαδημίας ἀρχηγέτης, καὶ Ἰωάννης Κρῆς, φυλῆς  
διορθωτίδος, πρυτανεύοντες. ἐπεχειροτόνησαν δὲ οἱ Νεα-  
καδημαῖκοι πάντες, ὧν Βαπτισῆς πρεσβύτερος, φυλῆς  
ἱεροπρεπίδος, καὶ Παῦλος Ἐνετὸς, φυλῆς εὐγενετίδος,  
καὶ Γεράνυμος Λυκαῖος ἱατρὸς, φυλῆς θεραπευτίδος,  
καὶ Φραγκίσκος Ροσῆτος Βηρωναῖος, φυλῆς διδασκα-  
λίδος, καὶ ἄλλοι συχνοὶ μαθητιῶντες ἤδη, καὶ τῆς  
Νεακαδημίας ἐπιθυμῶντες, ὀνόματι μόνον προσαγόμεναι.

Ἦν δὲ αὐτυχὴν ταύτην εἰς ἅπαντα, καὶ τὰς αὐτῆς  
ἐχομένης.



## NOVAE ACADEMIAE LEX

IACOBO MORELLIO INTERPRETE

**Q**UANDOQUIDEM studiosis eruditionis multa, eaque utilia ex colloctione Graeca obvenire consueverunt; de communi sententia visum est nobis triumviris Aldo Romano, Ioanni Cretensi (1), ac tertio mihi Scipioni Carteromacho (2) legem sciscere, ne aliter, quam Graeco sermone, invicem colloqui liceat. Si quis autem secus inter nos locutus fuerit, vel de industria, vel imprudens, vel etiam ipsius legis oblitus, vel alio quocunque eventu id fecerit, multa multatur; nisi forte quis consilio hac quoque in re deliquerit. Solvito autem qui peccaverit multam actutum; neque id in crastinum, aut in perendinum diem differtor. Qui vero non solverit, in duplum tenetor. Quod si ne illud quidem solverit, quadruplum, atque ita porro, pro ratione procrastinationis, exigitor. Qui autem legem parvi fecerit, aut multam solvere neglexerit, ex communi sectatorum litterarum Graecarum coetu expellitor, studiosorumque consuetudine indignus existimator, atque dein-

ceps hominis huiusmodi occursus velut inauspicatum quid habetor. Reponitor autem soluta pecunia singulis quibusque vicibus in marsupio aliquo, vel quidem etiam in pyxide ad hoc unum tornata: ea vero custodienda traditor aut nostrum alicui, aut alii cuiuspiam suffragiis a nobis constituto, quicumque is fuerit, dignoque muneris habito; clausa prius ea diligenter et obsignata, ut quam maxime tuta sit. Quando autem visum fuerit ut eadem aperiatur, in medium apponitor, pecuniaque numerator: ac si quidem haec ad convivii pretium et impendium satis fuerit, Aldo cum potestate traditor, ut ea nos ille splendide convivio excipiat; non quidem sicuti librorum impressores, sed quemadmodum homines decet Novam Academiam iam somniantes, quique eam Platonis propemodum exemplo instituerunt. Quod si nondum sat pecunia fuerit pro apparando convivio, in pyxidem iterum conditor, et ibi relinquitur, donec tanta insit ac exstet, quae convivio instruendo sufficiat.

At vero neminem liceat nobis convivam adhibere, nisi Graecarum litterarum utique studiosum, et eiusmodi choro dignum; non vi-

delicet hominem ullum illiteratum, Graecae eruditionis expertem, ac, quod caput est, a Nova Academia alienum, institutorumque nostrorum ignarum. Quod si quis hospes adsit, aut alienigena, uti solet, unquam advenerit, et alicuius negotii causa istic moram traxerit; si quidem eruditus et Graece sciens fuerit, ipse quoque iisdem, quae praescripta sunt, obnoxius esto: at si legi obnitatur, vel adversetur, veniam nullam suive purgationem consecutus, indicta causa, illico damnator, ac ex Nova Academia, utpote indignus, expellitor; neque exinde ullo unquam tempore inter nos admittitor, nisi eorum quae p̄rperam egit poenitens, legibus semel constitutis se teneri patiatur, ac sponsores quodammodo praebeat. At contra si quis litterarum Graecarum imperitus, quod vel eas nondum attigerit, vel non in ipsis tantum processerit, ut Graece colloqui valeat, sed iisdem adhucdum erudiatur, vel etiam erudiri studeat; hic quoque inter nos annumeratus, et ipse paullatim Graece, perinde ac nos, loqui assuescito: quod si ab ordine desciverit, vel profecto congressum nostrum etiam irriserit; in posterum excludi-

tor, neque rursus conversatione nostra, ne si quidem vehementer id oret, dignus habetor. Legem tulit Scipio Carteromachus ex ordine Lectorum. In suffragia miserunt Aldus Romanus Novae Academiae Princeps et Ioannes Cretensis ex ordine Correctorum Praesides. Suffragiis autem probaverunt Novi Academici omnes, inter quos Baptista Presbyter ex ordine hominum Deo dicatorum (3), et Paulus Venetus ex ordine virorum Nobilium (4), et Hieronymus Lucensis Medicus ex ordine eorum qui arti salutari sunt addicti (5), et Franciscus Rosetus Veronensis ex ordine Praeceptorum (6) et plerique alii, qui iam eruditionis et Novae Academiae desiderio tenentur, solo nomine adsciti.

Huic autem Academiae eique adhaerentibus utinam omnia prospere cedant.

*Academiae Aldinae initia ad annum saltem 1501 esse referenda, ex decreto Senatus Veneti, quo, ne libros ab Aldo impressos alii in hac urbe aliisve Reipublicae subiectis recuderent, aut ex aliena editione venderent, mense Novembri anni 1502 cautum est, satis constat; quod eo in hac urbe nostra, Divino adiumento, iam vel Neacademiam habet dictum de Aldo sit: Aldus autem ipse Orthographiam Graecarum dictionum Statii, mense Augusto anni illius 1502 impressam, Marco Musuro cum inscriberet, eandem secum in Academia fecisse declaravit. Sophocles, Herodotus, Ovidius, et Oratio Egnatii pro Benedicto Prunulo, anni ipsius; Euripides, Ammonius, Xenophon, Georgius Gemistus, Herodianus et Ovidius anni 1503; Oratio Carteromachi, Ioannes Grammaticus, Gregorii Nazianzeni Carmina, Q. AEmiliani Cimbriaci Encomiastica in Federicum et Maximilianum Impp., Homerus, et Demosthenes anni 1504 Academiam florentem ostentant. Anno tamen sequenti vix eius mentio ab Aldo fit, idque tantummodo in epistola ante Pontani poemata, qua se de ea*

*constituenda laborantem prodit: iamque anno 1508, quo Erasmus Aldum convenit, quaedam hic iucunde quidem somniabat; praesertim si sermo accederet de exstruenda nova Academia; sed fidem non praestitit, quemadmodum Erasmus ipse Ambrosio Leoni scripsit ( Oper. T. III. P. I. p. 507 ). Quae insecta sunt bella Aldo gravia adeo fuere, ut ne dum Academiae incolumitati aut incremento consulere ipse posset; verum etiam Venetiis excedere, ac Mediolani Ferrariae alibique diu degere coactus; typographiae quoque intermissionem se ante iam quatuor annos mente agitasse, Andreae Naugerio in dedicatione Pindari, quem tamen ipsum ex Academia nostra, ut inquit, anno 1513 emittebat, profiteretur. Spem demum hac de re totam in Lucretia Borgia Ferrariae Duce reposuerat; cui Strotiorum poemata anno eodem impressa cum dedicaret, hanc quoque ceteris eius laudibus adiiciebat: Adde etiam quod, pro summis, quibus praedita es, virtutibus, dignissima es, quam laudent honorent venerentur omnes; atque ipse in primis, cum propter alia, tum quia Academiam, cui constituendae iam*

multos annos studeo, tuis opibus, tuo solius sumptu facturam te, sinant tempora, ultro mihi receperis. *Biennio post Aldi mors consilia de Academia omnia redegit in nihilum: quae profecto, quod scriptoribus antiquis Graecis et Latinis emendandis et in lucem proferendis dedita praesertim esset, si qua alia, ut perpetuo duraret, rei litterariae maxime intererat.*

*Aldo quinam socii in Academia essent, apertius, quam scriptoribus etiam de ea praecipuis antehac innotuerit, modo constat: ac inter eos quidem, quantum video, annumerandi sunt Petrus Bembus, Angelus Gabriel, Paulus Canalis, Andreas Naugerius, Daniel Renerius, Baptista Egnatius, et Nicolaus Iudecus, qui Veneti omnes; Ioannes Iucundus et Franciscus Rosetus Veronenses, Scipio Carteromachus Pistoriensis, Hieronymus Aleander Mottensis, Hieronymus Menochius Lucensis, Marcus Musurus Cretensis, ac Ioannes itidem Cretensis. Alios, eosque multos, quorum nomina lateant, iis accessisse, omnino puto. At, quos adiutores studiorum suorum Venetiis Aldus habuit, vel*

ante institutam *Academiam*, vel postquam ea floruit, societatis illius participes affirmate non ego nuncupo: inter priores nimirum *Iustinum Decadyum Corcyrensem*, *Aristobulum Apostolium Cretensem*, qui et *Arsenius Archiepiscopus Monembasiensis*, *Alexandrum Agathemerum seu Bondenum Venetum*, *Urbanum Bolzanum Bellunensem*, *Thomam Linacrum Anglum*, *Gabrielem Braccium Brasichellensem*, *Hieronimum Avantium Veronensem*; inter posteriores autem *Ianum Lascarem Rhyndacenum*, *Desiderium Erasmus Roterodamensem*, *Demetrium Ducam Cretensem*, *Ioannem Baptistam Rhamnusium Venetum*, et alios, quorum de *Aldinis* editionibus merita egregia patent.

(1) De *Ioanne Rhoso Cretensi* cogitatio subit, qui codicibus Graecis exscribendis operam diutissime impendit, ut ex plurimis, qui adhuc supersunt, compertum est; eaque de caussa ad munus correctoris librorum in *Academia* obeundum accomodatus omnino fuisset. Ac *Venetiis* quidem diu librarium egisse et anno etiam 1492. *Athenagoram* et *Stephanum Byzantinum* pro *Laurentio Me-*



*dice descripsisse certum est* (Bandini Catalog. Codd. MSS. Graec. Laurent. T. II. p. 144): *deinceps attamen Romae degens occurrit, ubi anno sequenti Stobaeum descripsit* (Bandini Lib. cit. p. 447) *et anno 1514, pro Alexandro Farnesio Cardinali, extrema aetate Aphthonii et Hermogenis exemplum confecit* (Fabricii Bibl. Graec. ed. Harlesii T. V. p. 788). *Num intermedio tempore, quo Academia Aldina floruit, Venetiis fuerit, eamque ipse auxerit, nullo argumento, quantum saltem novi, probari potest.*

*Non itaque alius hic mihi est, quam Ioannes Gregoropulus Cretensis, qui epigrammate Graeco, ad initium Etymologici Magni anno 1499 Venetiis impressi, Nicolaum Blastum Cretensem, quod sumptus pro illius editione fecisset, laudavit; eidemque Blasto Hesiodum, quem ipsius itidem impensa descripserat, epigrammate alio nuncupavit; codice ipso adhuc superstite in bibliotheca Mosquensi Sanctae Synodi a Christiano Friderico Matthaeio nuperrime relato* (Notitia Codd. MSS. Mosq. Lipsiae 1805 T. I. p. 185). *Hic ipse vero Ioannes Cretensis Academicus Aldinus idem*

*utique mihi videtur, cuius Beatus Rhenanus meminit in epistola ad Carolum V. Imp. operibus Erasmi anno 1540 in editione Basileensi praefixa, cum de Ioanne Conone Narimbergensi Ordinis Praedicatorum praeceptore suo scribit, quod Ioanni Amerbachio pro editione Basileensi operum Sancti Hieronymi addictus, e vestigiis antiquorum codicum ea quae vel deerant, vel erant depravata, diligenter reponebat: idque poterat homo propemodum Graece, quam Latine, doctior, versatus nimirum in optimis auctoribus, aliquot annis excellentissimorum in Italia professorum, Marci Musuri et Scipionis Carteromachi, quorum ante meminimus, atque Ioannis Cretensis minime poenitendus auditor. Id sibi facile suadeat, qui Cononem in epistola, qua Iodoco Gallo Basilii Magni libellum de differentia usiae et hypostasis, a se Latine redditum Patavii anno 1507 misit, haec scripsisse sciat: In Italiam fato nuper, Venetaque ad litora veni, ubi Aldum illum Romanum, veluti alterum Alanum, vidi; ab eoque perhumaniter exceptus, cum eius hortatu animum paene concussum, incerta sede nutantem, quiete illa,*

quam bonae litterae pariunt, firmare contendere, ex adverso insurgens fortuna inquit : Quid tibi vis pauper etc. . . . Venetiis primum, ope Aldi Romani et Fabii Columnii docti et humani presbyteri, litteris Graecis operam navavi : deinde, ut maiori proventu iisdem et sacras adiicerem, ad Patavinum gymnasium concessi, ut illum utriusque linguae praeceptorem Marcum Musurum Cretensem, summa gloria et profectu, cum reliquo philosophorum et theologorum coetu, legentem audirem. *Quibus testimonium aliud eiusdem Cononis accedit in praefatione ad Gregorii Nysseni libros octo a se Latine vulgatos ex versione Burgundii Pisani* : quam, inquit ille, reformavi illis denique Graecis dicendi proprietatibus animatus, quas potissimum a praeceptore meo in utraque lingua disertissimo, Marco Musuro Cretensi, nuper in gymnasio Patavino didici, antea vero Venetiis sub Aldo Romano veluti parente et initiatore : addam, et Scipionem Carteromachum eruditorem perhumanum. *Haec et alia scripta Cononis Basileae anno 1512 impressa sunt.*

(2) *Magna fuit Scipioni Forteguerrae Pistoriensi, qui Carteromachus appellari ma-*

luit, cum Aldo studiorum officiorumque coniunctio. Libros Graecos ab eo impressos, nimirum Aristotelis Organum, Thesaurum Cornu-  
 nicipiam Hortosque Adonidis, Dictionarium Graecum, Aristophanem, Homerocentra, Iulium Pollucem, Nonnum, Gregorium Nazianzenum, Anthologiam, Demosthenem, Constantini Lascaris Grammaticam, epigrammatibus et epistolis Graecis Carteromachus exornavit: ab Aldo inscriptionem Iuvenalis et Persii laudesque multas vicissim tulit. Aca-  
 demiam, in qua Graece loquendum esse hac lege a se scripta et lata statuit, litteris etiam Graecis tradendis iuvisse, Aldus testis est in praefatione ad librum tertium Grammaticae Lascaris; qua libros Apollonii grammaticos in ea explicasse prodit. Fit iccirco ut in eadem quoque habita videri possit Oratio de laudibus litterarum Graecarum, anno 1504 Aldi typis impressa, qua Demosthenis interpretationem tunc aggressurus, Venetos, tanquam ad litteras illas capessendas atque servandas instructissimos sic alloquebatur: Quare beatum iudico eum, quem cuius studio incumbentem degere in Veneta civitate

contigerit, sed beatissimum, quem litterariae facultates exceperint; cum tot praesertim tantaque undique suppetant affluentque ad eam rem commoda, ut fingi fortasse plura possint, haberi certe non possint. Ibi enim, ut alia omitteram, tanta librorum copia, quanta post Gothicam ruinam nunquam fuit, nec veteribus vero Romanis aut Graecis florentibus, in his quae exstant, fuisse credi par est; cum novo hoc invento carerent imprimendorum librorum, qui et pulcherrimi iam atque emendatissimi prodire incipiunt, Aldi potissimum nostri opera; de quo illud habeo dicere, quod de Porphyrio inquit Simplicius: Omnium bonorum nobis auctor Aldus. *At vero ad annos quoque superiores Carteromachi schola haec est referenda, ex epistola Benedicti Philologi, qua Petri Criniti libros de Honesta Disciplina, Florentiae anno 1504 impressos ei dicavit. Notum est omnibus, inquit ille, quantum eruditio tua in Veneta Academia a viris doctis celebretur, qui te poetam et oratorem maximum, nec non inter philosophos eloquentissimum, et inter eloquentes philosophum summum appellant. Non est hoc silentio praetereundum, te*

publice in eadem urbe celeberrima annis superioribus, tanto omnium concursu et favore Graecas litteras professum, et ea haud veritum interpretari, quae in hunc usque diem aut pauci admodum, aut nullus aggredi est ausus. *Multa sunt de Carteromacho in Diario Litteratorum Italiae T. XX et T. XXVI a Fontaninio dicta, a Zacharia in Bibliotheca repraesentata et aucta: quem equidem reconditae et absolutae eruditionis hominem Erasmus, ut primum Bononiae congressus cum eo est, appellavit.* (Epist. ad Iodocum Gaverum, Oper. T. III, p. 788); *tanta Graece loquendi et scribendi facultate praeditum Petrus Alcyonius dixit, ut solus, post veterum Graecorum, Platonis, Isocratis, Demosthenis, et Strabonis interitum, orbae eloquentiae tutor relictus videretur.* (De Exilio p. 247 ed. Lips. 1707); *in litteris autem tradendis usque ad eo probatus fuit, ut Pierius Valerianus scripserit: Plurimum is proderat ingeniis, abditissimos quosque locos disciplinis in omnibus interpretando; ut facile diceres, nihil ad suam usque diem scriptum, quod ille non legisset, nihil ab eo lectum, quod non in aliorum fru-*

gem benignissime communicaret (De Infelicit. Litterat. p. 356. ed. Lips. 1707.)

(3) *Baptista Egnatius, familia Cipellorum Venetiis ortus, litteras humaniores in patria annis fere tricenis professus, maxima auditorum frequentia, scriptisque non paucis editis, magnum est nomen adeptus; quod commentariolo de illius vita et scriptis accurate confecto, Ioannes Augustinius instauravit illustravitque. Specimen eius ingenii primum typis editum. Oratio scilicet in laudem Benedicti Prunuli praeceptoris sui, anno 1502, ex Academia Aldina prodit. Aldo eiusque officinae in editionibus scriptorum Latinorum curandis, praesertim Valerii Maximi, Epistolarum Plinii, Lactantii, Apologetici Tertulliani, Gellii, Suetonii, Scriptorum Historiae Augustae, Eutropii, Officiorum Ciceronis, Celsi, perutilem operam ipse praebeuit. Tantam de eius in se benevolentia fidem Aldus habebat, ut moriens ultimae voluntatis executorem, una cum viris aliquot aliis sibi constanti amicitia coniunctis, fecerit; testamento anno 1515 scripto, quod a Zacharia demum vulgatum est (Bibliot. di Storia Let-*



ter. T. III. P. I. p. 378). *Egnatius, Aldo mortuo, Lattantium a se recensitum emisit, laudes eius praecipuas epistola ad Antonium Trivultium luculenter complexus, qua haec quoque inquit: Vixit ille quandiu licuit, et vixit in summa omnium probitatis ac eruditionis opinione. Neque enim ulla tam barbara, tam remota gens hodie Europae finibus includitur, cui non notissimum Aldi nomen, ac celeberrimum fuerit: sed et plerosque non ignobiles viros vel hac sola causa Venetias venisse constat, ut unum hunc salutarent et viserent, magnisque etiam muneribus donarent; et quos urbs tanta tamque admirabilis ad sui contemplationem non traxerat, unius viri fama perduxit, adhortati pro virili ut instituto restituendae Latinae ac Graecae linguae proposito insisteret.*

(4) *Paulum Canalem Venetum ex gente patricia in Academiam Aldinam cooptatum fuisse nunc primum cognoscere est: quod rectissime factum testimonia de eius doctrina luculentissima suadent. Egnatius in Racemationibus, quo opere libros quosdam de Genealogia Deorum a Canali pene ad exitum*



*deductos commemorat, sic de illo ominabatur* (Cap. 6): Quem locum *Iuvenalis* caecutientes nos admonuit iuvenis et Graece et Latine apprime doctus Paulus Canalis Patricius Venetus, flos delibutus, ut ille de Cethego vetus poeta; quem vere, si vixerit, quod Superi feliciter annuant, phoenicem unicum futurum spero: tam pertinax illi studium, tam acre sublimaeque ingenium, tam tenax memoria, tanta praeterea est morum probitas. *At spem eiusmodi pulcherrimam morte abruptam, ex Pierio Valeriano libro primo de Infelicitate Litteratorum ita scribente intelligimus*: Sane quidem cum de litteratis sermo est, nullius egolibentius meminerim, quam Pauli Decanalis, qui quantae fuerit eruditionis, nulli non innotuit. Is enim vix quintum et vigesimum aetatis annum attigerat; et praeter absolutissimam Latinarum Graecarum et Hebraicarum litterarum cognitionem, disciplinas etiam illas illustriores, philosophiam, astrologiam, et mathematicas reliquas artes non primis, ut multi, labris degustaverat, sed pleno fonte exhauserat. Qui quidem, dum praestanti labore Ptolemaei Geographiam, non tam temporum, quam im-

peritorum hominum iniuria, passim depravatam incolumitati pristinae reddere contendit, neque sibi die, neque noctu parcat, tam utilem et iucundam humanis ingeniis cognitionem brevi exhibiturus; ex nimia scribendi assiduitate nixu et perseverantia, rupta intra pectus vena, ita sanguinem coepit evomere, ut nulla medicorum arte sisti posset. Tum ille fatalem instare diem inspiciens, id unum habuit praematurae mortis et interceptae in studiis gloriae solatium, quod, rerum aliarum omnium contempta cura, sacris initiatus, et in Augustinianorum Eremitarum claustra inclusus, intra paucissimos dies, intaminatae iuvenis vitae, integerrimum pudicissimumque animum coelo reddidit. *Obiit Canalis anno 1508, non Eremita Augustinianus, sed Monachus Camaldulensis ante paucos dies factus: de quo monumenta praecipua scriptis tradita Ioannes Augustinius tomo secundo de Scriptoribus Venetis collegit: Addam ego Athenaei codicem, olim Palatinum, modo Parisiensem, anno 1505 et sequenti a Paulo Decan. Veneto Patricio exaratum, a Schweighaeusero in editione sua Athenaei praestantissima afferri;*

quem ab uno quodam ex familia Veneta Deggan prodiisse is perperam putat, cum a Paulo Canali re quidem vera descriptus ipse fuerit.

(5) Hieronymo Menochio Lucensi inter Academicos Aldinos locum fuisse, ex hoc ipso monumento nunc itidem primum cognoscere licet: neque tamen novum eius nomen apud eos est, qui conatus et scripta Italorum pro recto medicinae studio instaurando norunt. Epistolam ad Nicolaum Leonicensem anno 1503 is dedit, haec quoque scribens: In his sane tuis scriptis multa rep̄ri quae mihi cordi fuere, sed praecipue unum de cane rabido, de quo olim in domo Aldi Romani Venetiis, coram Nicolao Zoccha Veneto medico verba feceram multa; quoniam Dioscoridem Graece legeram multosque alios iuniores Latinos, talem gravissimum morbum eiusque curationem ex arte ponentes. . . . Hortor te, ut quoad per tuas occupationes licet, Galeni reliqua volumina interpretanda aggrediare, vel si aggressus es, iam edere festines. Quid enim mendosius eius Latinis libris circumfertur, quidve magis tetrum? Adeo enim eius libri deprava-

vassi sunt, ut quivis eos legere aspernetur; et quanquam eorum lectioni multum insudet, ex ea tamen nullum saepe, interdum pravam sensum elicere possit, cum Graeca librorum Galeni lectione nihil sit elegantius. *De locis nonnullis Dioscoridis quidnam Leoniceus sentiret, Menochius rogabat; cui tanquam philosopho et medico praestantissimo ille respondens: Quam mihi, inquit, nuper reddidit Franciscus Tottus Lucensis, communis amicus, epistola disertissima, plane mihi indicavit, te non esse ex numero illorum qui barbaram philosophiam ac medicinam profitentur: alioquin non tam eleganter scriberes, neque tantopere nostras translationes, aut nostra scripta, quibus praecipue barbaros auctores vellecamus, comprobares. Equidem hac tua epistola lecta, coepi de saeculo nostro bene sperare, cum videam me tales habere viros idem mecum de tota philosophia et medicinae arte sentientes, qualis tu unus es, et alter Constantius noster Pistoriensis, vel quidam alii, exigui sane numero; sed „ Bello vivida virtus “. Edita utraque epistola est cum Leonicei libro de Plinii et plurium aliorum me-*

*dicorum in medicina erroribus, scriptisque eius quibusdam aliis, Ferrariae anno 1509 impressis.*

(6) *Franciscus Rosetus Veronensis, et ipse nunc primum Academicis Aldinis annumerandus, idem fortasse est, de quo Aldus in epistola ad Baptistam Guarinum ante Theocritum Hesiodum aliosque poetas Graecos, anno 1495 a se impressos, scribit: Hanc interpretationem ( Distichorum Catonis ) in membrana abhinc trecentis annis et plus eo scriptam, litteris prope exesis ut vix dignosci possent, vidisse se retulit mihi Franciscus Roscius, iuvenis plenus fide et Graece et Latine apprime doctus. Nec mirum; est enim ipse ex tua felici Verona oriundus, quae mater et alumna est, et semper fuit doctissimorum hominum: de quo eodem in epistola ad Marinum Sanutum ante Ovidii Fastos anno 1503 impressos, haec habet: Quos Ovidii versus dedit mihi imprimendos Franciscus Roscius Veronensis, vir utraque lingua eruditus, ac diligens indagator antiquorum voluminum, seque ab antiquissimo codice accepisse retulit. Roscium Maffaeius novit, non item Rosetum;*

*atque adeo huius nulla scripta in Verona illustrata retulit. Hymnos Roseti in Divos legit Sabellicus, et valde probavit epistola, cuius initium (Lib. XII. Epistolar.): Legi hymnos tuos, legique cupidissime: eo dico cupidius, quo res fuit diutius expectata. Incesserat incredibilis cupiditas animum tuae istius hymnologiae videndae: sed tu omni expectatione mihi maior occurris, comptus, elegans, venustus, multo veteribus, quam nostris, propior. Difficile dictu est, quam ex omni parte placeas: fecisti certe ut te, quem semper dilexi, iam et amare et mirari incipiam. Debet tibi omnis Christiana pietas; sed omnium, maxime protomystae et hymnicines, qui per te habebunt quod et cantent et utiliter legant. Eorum in laudem hosce versus Coelius Calcagninus fudit, cum suis aliis, et Ioannis Baptistae Pignae ac Ludovici Areosti, Venetiis anno 1553 impressos pag. 178.*

De Hymnis Rhoseti Poetae

Hymnos ne metuas mei Rhoseti

Divina gravitate delibutos,


Quis Paeon melior relevit omne

Terrai vitium interire posse.

Vivent, crede mihi, nec iis nocebunt  
 Cana secula; non enim deceret  
 Immortalibus esse dedicata,  
 Quae dispendia temporum subirent.

*Hymnos Roseti editos vidi nunquam: bene vero tres ipsius de Vita Divae Ursulae libros heroico carmine conscriptos, quibus Mauris titulus est. Henrico VIII Angliae Regi eos dedicavit, ac Venetiis anno 1532 impressos ad eum per filium misit, de paupertate, qua vexabatur, conquestus. Laudibus qui poema immodice extollerent, non defuisse; praesertim Arsenius Apostolius Archiepiscopus Monembasiensis epigrammate Graeco, et Franciscus Renerius ac Labienus Velutellus Latinis duobus, quae adiecta in editione sunt. Numisma Roseti Museum Mazzucchellianum Tabula XLVIII exhibet, in quo Liberalium Artium Professor dictus apparet.*

---
















FD-302 (Rev. 11-15-83)

---

**Österreichische Nationalbibliothek**



**+Z202262704**

